



KOŠARKA Dubravko Barbarić, generalni sekretar KSBiH

Savez je u najvećoj krizi u historiji

Uprava za indirektno oporezivanje počela prinudnu naplatu dugovanja, koja iznose približno 650.000 KM • Račun, za sada, odblokiran

Hoće li se, zaista, obistiniti najgori mogući scenarij, da Košarkaški savez Bosne i Hercegovine bude prisiljen staviti ključ u bravu zbog enormnih dugovanja, koja su se, kako su pokazale kontrole nadležnih institucija, nagomilala u periodu od 2011. do 2016. godine?

Generalni sekretar Košarkaškog saveza Bosne i Hercegovine Dubravko Barbarić, kojem smo jučer postavili to pitanje, nije se usudio dati negativan odgovor.

Ogromna dugovanja

Kako i bi kad je samo na ime neplaćenih poreza KSBiH dužan više od milion maraka.

Kad se dodaju ostale obaveze, od kojih je većina skrivana od članova Upravnog odbora, a koje je i Barbarić

otkrivao u hodu nakon što je u aprilu prošle godine preuzeo funkciju, dugovanja krovne kuće bh. košarke penju se na približno 2,5 miliona KM!

Najnoviju krizu ili, bolje rečeno, možda samo početak teških udara po Košarkaški savez BiH,

proizvelo je rješenje o prinudnoj naplati dugovanja Uprave za indirektno oporezivanje (UIO BiH), koja je utvrdila da Savez između 2011. i 2016. nije plaćao porez na dodanu vrijednost (PDV) u visini od 650.000 KM.

27.000

KM s računa Saveza u "NLB banci" skinuto je odlukom UIOBiH

S računa KSBiH skinuta su sva raspoloživa sredstva, uz mogućnost potpune blokade te pljenidbe pokretne i nepokretne imovine. Zbog toga je održan sastanak sa

predstavnicima UIO-a.

- Imali smo sastanak sa predstavnicima Uprave za indirektno oporezivanje, koji je bio veoma konstruktivan. Više informacija vjerujem da ćemo uskoro iznijeti u javnost.

Za sada mogu reći samo da se KSBiH nalazi u velikoj, možda i najvećoj krizi u historiji - rekao je Barbarić, koji je još krajem decembra podnio ostavku, ali je i dalje u tehničkom mandatu na ovoj funkciji.

Očekuju podršku

Potvrdio nam je Barbarić da račun Saveza u ovom momentu nije u blokadi, što je plod dogovora s Upravom za indirektno oporezivanje, ali da je ova mjera, kao i sve druge mjere prisilne naplate, izvjesna ukoliko tijela koja su i nadležna za sport, kao i ona koja su dala

određena obećanja, ne pruže podršku.

Podsjetimo, KSBiH je prošlog ljeta postao predmet interesiranja Tužilaštva BiH, prema čijem su nalogu poslovanje Saveza češljale Državna agencija za istrage i zaštitu (SIPA), Finansijska policija, porezne inspekcije... kada su i otkrivene finansijske nepravilnosti u KSBiH izranijeg perioda.

Sva su ova tijela nedavno završila svoje izvještaje, čije smo dijelove već objavljivali, a na Tužilaštvu je da procijeni koje mjere dalje poduzeti.

U međuvremenu, KS-BiH doslovno pokušava opstati, što će biti nemoguće ako izostane podrška, ali ona prava, koja bi sistemski riješila pitanje finansiranja Saveza, a ne samo privremeno gasila razbuktali požar.

E. J.

Upitan reprogram

Košarkaški savez Bosne i Hercegovine možda bi mogao pokušati dogovoriti reprogram duga za PDV, ali bi takva mjera, vjerovatno, bila kratkog daha.

Jasno je, naime, da Savez ne može izdvajati ratu od dvadesetak hiljada KM mjesečno samo za isplatu PDV-a kad postoje još mnoga dugovanja, uključujući 460.000 KM na ime

neplaćenih poreza i doprinosa, a koja tek trebaju stići na naplatu i prijete novim blokadama.

A gdje su tek dobavljači, kojima se, također, duguje, potom tekuće obaveze, plaće zaposlenicima, kao i reprezentativne selekcije, koje bi ovog ljeta trebale izaći na evropsku scenu i za koje u ovom momentu nema novca.



Barharić: Održan sastanak sa predstavnicima IHO-a